



Selasa, 8 Juni 2021

Ogen: Esekiel 1:1-3



Ku Begi Tuhan Ngerana



Nabi Esekiel eme nabi si erdahin ibas bena bangsa Israel ibenterken kubas pembuangan seh kubas piga-piga tahun kenca kebinasaan Jerusalem. Ikut ia ras kalak siitaban erkiteken ketalun Israel nandangi Babil. Erti Esekiel jine e me Dibata mpegegehi.

Ibas umur Esekiel 30 tahun, ia idilo jadi nabi ibas pembuangan guna nehken tenah Tuhan man bangsa Israel, adi la ia jera, mulihken man Tuhan ndat ukumen simberat tapi adi patuh terkelin ras selamat me bangsa e. Bagepe tugas Esekiel eme njelaskan engkai maka bangsa e itaban, nubuat ndabuhna Jerusalem ras maba bangsa e mulihken ku Dibata ras nehken pengarapen arah padan Dibata kerna keselamatan ras kemulihen ku Israel ngulih. Esekiel ngelai kira-kira 27 tahun dekahna. Ibas Tuhan ndilo ia jadi nabina ikataken maka ia idemi alu kuasa Tuhan. Bageme ia ngelai nehken peraten Tuhan guna mpegegehi bangsa e alu ngandalken kuasa Tuhan.

Kai banci sipelajari arah kegeluhen Esekiel, cara Tuhan ndilo serayanNa unik, pelain-lain kerina tep-tep nabi. Tapi sada nge tetap tujun Tuhan, eme gelah banci IA ngerana man bangsaNa arah nabi e. Bageme pe cara Tuhan nangkap kita jadi sikerajangenna, pelain-lain kerina. Tapi kerina e eme cara Dibata ncidahken keleng ate ras sura-suraNa. Tep-tep kita kalak sierkiniten idiloNa janah ngerana man banta, tep-tep wari IA ngerana, arah kataNa, arah pusuhta, arah tinepaNa. Uga respona? Adi Esekiel reh Tuhan arah pengenehenna, maka nina Kubegi sora Tuhan. Ibas kita megiken sora Tuhan kita arus tunduk ras patuh, maka kuasa Tuhan ndemi kita. Sora Tuhan si begiken, si dalanken, kuasa Dibata mahanca mehuli perulihenna. Alu bage kata wari pe sibegi soraNa, megegeh kita ras mereken kuasa ndalani wari-warinta.